

La Quotidiana 3-12-2013, p. 2

Buna politica è politica gista

■ (mc) En ses pled d'avertura ha il president dil cussegl grond *Hanspeter Michel* tematisà la politica gista ord l'optica d'in discurs fictiv tranter in filosof, in politolog, in sociolog ed in simpel lavurant.

Il filosof manegia ch'i na dettia betg giustia tenor nossa idea da la ch'igl valia il dretg dal ferm. La giustia d'ina societad saja in construct artificial che sa basia sin ina repartiziun gista, la premissa per quai saja imparzialitad. Tenor il politolog sa basa la repartiziun gista sin ils trais principis da l'egualitad, dal basegn e da la prestaziun.

Per il sociolog n'è la giustia betg ina dumonda matematica, ella è er ina dumonda da la sensaziun da la societad. Retschertgas documenteschian che persunas ch'èn economicamain flaihlas sajan plitost per il princip da l'egualitad e dal basegn e che persunas situadas meglier prefereschian il princip da la prestaziun.

Il simpel lavurant n'è betg encunter sch'ils megliers sportists d'elita en il ballape, en la formula 1 ubain en il tennis gudognan blers milliuns, schebain che quai n'è er betg propi gist. «Ma sch'in manager suprem incassescha vinavant milliuns era sch'igl è cumprovà ch'el ha fatg sbagls, m'agita quai e sche jau aud alura anc las giustificaziuns marschas, stoss jau rietscher», manegia il lavurant. Tgi che presta bler duai era survegnir bler, quai saja en urden, el portia dentant era responsabladad envers il manaschi ed ils collavuratur.

«La mentalitad da raffader periclitescha persistentamain la coesiun da nossa societad», avertescha Michel. El dubita dentant che quests abus possian vegnir reglads mo cun leschas, quai saja plitost ina dumonda da las normas e da las valurs da nossa societad. Maniera e modestia na possian ins betg decretar ed anc mender controllar, concluda Michel.